



SAHOL HAMID ABU BAKAR (duduk. lima dari kiri) dan Hasan Mad (duduk, enam dari kiri) bersama tetamu kenamaan yang hadir dalam majlis Penyerahan Surat Pelantikan Penyandang Kursi Institusi Raja-Raja Melayu UiTM di Shah Alam, semalam.

Penubuhan Kursi Institusi Raja-Raja Melayu mampu memperkasa pemahaman rakyat

SHAH ALAM 30 Dis. - Penubuhan Kursi Institusi Raja-Raja Melayu oleh Universiti Teknologi Mara (UiTM) mampu memperkasakan pemahaman rakyat terhadap peranan serta fungsi institusi raja-raja Melayu di negara ini.

Naib Canselor UiTM, Tan Sri Prof. Ir. Dr. Sahol Hamid Abu Bakar berkata, rakyat terutama generasi muda perlu memahami kedudukan institusi raja-raja Melayu di bawah Perlembagaan Persekutuan selain menjadi asas kepada pembentukan negara.

“Sesungguhnya inilah rakyat yang mewarisi tatasusila dan jati diri bangsa beradab. Bangsa Melayu dan sekalian rakyat berbangsa lainnya turut sama bernaung di bawah payung Seri Paduka Baginda.

“Dalam hal ini, UiTM berasa bertuah dipayungi Seri Paduka Baginda Yang di-Pertuan Agong yang merupakan Canselor yang kami kasihi. Justeru universiti sebagai tempat membudaya ilmu kami mengambill keputusan berperanan atas rasa kesedaran mahu memelihara ke-

daulatan raja-raja Melayu dalam ruang lingkup serta kemampuan kami,” katanya.

Beliau berkata demikian ketika berucap dalam majlis Penyerahan Surat Pelantikan Penyandang Kursi Institusi Raja-Raja Melayu UiTM di Bangunan Canselori di sini hari ini.

Yang hadir sama, penyandang kursi tersebut, Setiausaha Agung Majlis Perundingan Melayu (MPM), Datuk Dr. Hasan Mad, Timbalan Naib Canselor Akademik dan Antarabangsa, Prof. Sr. Ir. Dr. Suhaimi

Abd.Talib serta ahli-ahli MPM.

Tambah Sahol Hamid, dengan adanya kursi itu, mampu menjadi tempat rujukan bagi mana-mana pihak untuk mengetahui dengan lebih jelas wasiat raja-raja Melayu dan peranannya untuk menjaga kepentingan dan kedudukan masyarakat Malaysia.

“Pelantikan sebagai penyandang Kursi Institusi Raja-Raja Melayu akan berkuatkuasa mulai 4 Januari tahun hadapan dan Datuk Dr. Hasan Mad akan menjalankan tugas bagi

tempoh dua tahun,” katanya.

Sementara itu, Hasan ketika ditemui menyifatkan watikah pelantikannya sebagai satu cabaran besar berikutan telah hampir 23 tahun meninggalkan dunia akademik di Universiti Putra Malaysia sebagai pensyarah.

Bagaimanapun kata beliau, pelantikan tersebut merupakan satu amanah yang perlu dilaksanakan bagi memastikan institusi raja-raja Melayu dapat dimartabat dan terus dipertahankan di negara ini.